

淮阳集 元 张宏范

提要

原序

淮阳集

淮阳集诗余

后序

提要

《淮阳集》一卷；附录《诗余》一卷。元张宏范撰。宏范，字仲畴，易州定兴人，汝南忠武王柔之第九子也。官至镇国上将军、蒙古汉军都元帅。将兵入闽广，灭宋于厓山。师还而卒。累赠太师、淮阳王，谥宪武。事迹具《元史》本传。其遗诗一百二十篇，词三十余篇。燕山王氏尝刻之敬义堂，故宋礼部侍郎庐陵邓光荐为之序。光荐，即宏范南征时被获不屈，因命其子珪，事以为师者也。后其曾孙监察御史旭重刊。明正德中公安知县周钺又重刊之。此本即从钺刻传录，盖犹旧帙。

宏范尝从事于郝经，颇留心儒术。其诗皆五七言近体，虽沿南宋末派，然大抵爽朗可诵，如“中酒未醒过似病，搜诗不得胜如愁”，置之江湖集中不辨也。亦无愧曹景宗之赋竞病矣。

原序

曩者，天兵克季宋于崖山时，则淮阳献武王实以元帅统师，爰振其武用，燿赵焜，勲劳之大，载在史册，藏之金匱，天下后世知其功高。

乃若词章之盛，人或不能尽知也。王之里人金台王氏尝以王之诗歌、乐府刻于其家敬义堂。虽特其仅存之稿，然，于是足以知王之词章为优为耳。盖王以事业之余，适其性情而聊以见之吟咏，往往托物感兴为多，而在于射猎击球之事者无几。况夫，雅韵清辞，雍容谐协，固非服介冑者之所能及。至其读韩信、李广传诸作，英气伟论，卓犖发扬，又岂拘拘律度之士所能道哉。

惟王世在名门，天资超迈，幼尝学于郝公伯常，而友邓公光荐，恒与巨儒学士大夫交，故属意文字为甚。王之子恒阳忠献王歷事累朝，弼成文治，为世文臣。平生立朝，大节若汉之丙魏、唐之房杜，皆王所素教焉。今其曾孙旭为江南诸道行御史台监察御史访求先世遗文，得敬义堂所刻。顾其集，犹王之旧谥“武烈”题其首，欲重梓之，从宣因僭为之叙，以着王之好儒尚文，辞章祇其余事，且使天下后世之人知王之世家不独高于武功也。

至正十年庚寅九月吉日 中宪大夫江南诸道行御史台治书侍御史 许从宣 谨

叙

故都元帅赠平章谥武烈张公，讳宏范，字仲畴，河内人，蔡国武康公第九子也。天分英特。少从郝经学士，虽观书大略率意，吐辞往往踔厉奇伟，据鞍纵横，横槊酾酒，叱咤风生，豪快天纵。其诗类楚汉间烈士语。余尝谓气，文章之主，诗笔特功名余。豪曹氏父子，气雄建安。刘越石悲愤之作，犹度越晋人远甚，斛律金《勅勒》、六朝文士所无，唐刘幽求、严武、张建封辈，一联半句音节豪宕，自别是。固难以常人捡押翰墨，径畦论也。中原，文献荒芜，士少有，得辄自有余。惟武烈公所作，未尝属稿，篇什随手散落，后亲友网罗遗失，得其仅有者，为诗词若干。将传于后，属余序。惟立功立言，自古难并勲业，盖世往往掩其它长。矧公文章，赫赫照映，非出偏长以与文士角逐者，然英英在纸，略见其人决非营度出吻，笔下辄止者所能学，亦非凌烟阁上进贤冠、大羽箭所能尽存之穹壤。要是：古今一奇。

庐陵邓光荐序

淮阳集

○五言律

【泛舟继韵】

风软扁舟稳，行依绿柳堤。孤尊秋露滑，短棹晚烟迷。夜静月初上，江空天更低。飘飘信流去，误过子猷溪。

【雨霁登楼】

楼外雨初霁，乾坤望眼明。岸高秋涨满，帘卷暮霞生。燕入泥香润，龙归海气清。阑干残照底，一片古今情。

【月夜独酌】

白酒谁同饮，青尊祇自开。山风吹雨去，海月上天来。雅兴高千古，狂歌复一杯。何当呼李白，同醉凤凰台。

【柳塘避暑】

避暑溪塘上，悠然世虑疎。挂冠疑过鸟，濯足碍行鱼。雨过波纹细，风来树影虚。消磨长日事，棋罢数行书。

【莲湖泛舟】

载酒扁舟稳，平湖绮绣乡。半竿残月暮，十里晚风香。桂楫分云锦，荷杯吸露浆。浩歌明月底，惊起宿鸳鸯。

【携妓泛舟遇雨】

醉漾扁舟去，欢生尽棹迟。舞回风过处，歌罢雨来时。风铎传琼液，鸾刀脍玉丝。池塘烟树外，一一画中诗。

### 【夏日道中】

六月长安道，功名两字催。云头烘赤日，马首渗黄埃。汗额挥淫雨，饥肠转殷雷。输他河朔客，冰酒泻荷杯。

### 【遼烟】

惨淡微风外，氤氲老树头。乍惊香雾薄，遥认断云浮。日落山腰暮，雨晴天际秋。清明藏不得，一片晋家羞。

### 【宿】

马疲盘道峻，投宿入招提。雨急山溪涨，云迷岭树低。凉风来殿角，赤日下天西。偃腹虚帘外，林空鸟恣啼。

### 【枕上】

客懷苦长夜，欹枕冷掀髯。半壁荒灯暗，穷途老泪淹。惊乌疑月树，窃鼠怯风帘。百虑秋中集，无由到黑甜。

### ○五言絕句

### 【醉中遣兴（六首）】

把酒莫辞频，呼童更疾温。清明三月节，庭院又黄昏。  
把酒莫辞霎，休教尊酒空。光阴不复得，流水只流东。  
酒兴唯诗赖，诗懷实酒因。高吟到佳处，满酌岸清巾。  
满酌莫宜侧，高歌不论声。醉时狂起舞，何必待鸡鸣。  
酒尽兴不尽，心竒诗亦竒。更沽一斗酒，须到百篇诗。  
饮酒莫妨事，吟诗休费心。酒从闲里饮，诗向兴来吟。

### 【餅中桃竹】

竹同君子操，花胜丽人粧。洞里神仙客，谁教嫁阮郎。

### 【花影】

明月招春魄，移痕上小牕。暗香浮枕簟，乘兴灭银釭。

### 【寄刘仲泽】

已负中秋约，休愆九日期。东篱把菊坐，共赋南山诗。

### 【述怀】

太古一轮月，浮云几度漫。阴晴从万态，桂影自高寒。

### ○七言律诗

### 【述怀】

已着戎衣十载过，江南未了鬢先皤。前生应欠路途债，今世故教离别多。功业千年须好在，荣华一笑待如何。几时得遂归欤志，高咏渊明岁暮歌。

### 【赴大名路任】

诏引春风下帝庭，恩教迁镇大名城。天寒日短催行色，雾重霜浓接去程。

鹏翼垂天今日志，马头洒泪故乡情。深承父老殷勤送，何日儿童竹马迎。

### 【晚凉楼饮】

携壶信步曳长筇，来趁楼头满面风。龙驾金乌啼海北，鲸吹璧月上天东。愁空浊酒襟怀豁，气入新诗句法雄。此意谁人能会得，古今好个谪仙翁。

### 【初夏】

醉窗睡足碧纱凉，帘卷熏风燕子忙。满地落花惊晚吹，一溪流水带斜阳。等闲岁月过难再，牢落功名拙自伤。青镜祇愁霜鬓改，光阴空老郭汾阳。

### 【新蝉】

齐宫怨女梦初惊，犹对熏风诉别情。一自返魂遗旧壳，便将秋恨入新声。断桥高柳天将暮，落日空山雨乍晴。铁石肝肠人听得，也应白发为君生。

### 【雏燕】

羽为香润态含痴，睡足云兜力尚微。唤母但能啾唧语，恋巢犹倦往来飞。熏风庭院帘初卷，落日池台人乍归。白凤赤龙浑异事，争如随分着乌衣。

### 【和郑云表初夏】

一年好处艳阳天，风絮苔红意惨然。寂寂妍春空造化，炎炎畏日乍威权。香盈脾蜜蜂衙歇，泥足梁巢燕寝便。旋坼酒香浇郁气，园林青杏落诗笺。

### 【射柳】

年少将军耀武威，人如轻燕马如飞。黄金箭落星三点，白玉弓■〈门外井内〉月一围。箫鼓声中惊霹雳，绮罗筵上动光辉。回头笑煞无功子，羞对薰风脱锦衣。

### 【打球】

锦绣衣分上下朋，画门双柱耸亭亭。半空彩仗翻残月，一点绯球迸落星。翠柳小厅喧鼓吹，玉鞭骄马蹙雷霆。少年得意风流事，可胜书生对夜萤。

### 【假山】

性癖佳山未得亲，旋移远石象天真。峰峦草树安排好，岩壑风烟领略新。路转柳遮青隐约，雨余苔渍碧嶙峋。尽教做尽千奇怪，时下窗前爱主人。

### 【述怀】

春风满鬓绿鬃松，落落胸怀气吐虹。节操自知坚雪竹，行藏未必属秋蓬。歌中牛角两行泪，舞彻鸡声一剑雄。肯似少年场上客，笙箫日醉软香中。

### 【过双堦】

千丈黄尘倦客途，林梢遥认两浮图。数家荒店留行李，一带遥山入酒壶。勲业壮年劳梦寐，等闲老境寄江湖。前途黯黯深沧海，惆怅西楼日向晡。

### 【宿龙门】

落日苍崕列翠屏，翠屏围宿暮云横。溪声清入诗人耳，山势斜盘客子程。

青草路凉羸马饱，碧林月冷倦乌惊。明朝飞过龙门去，直挽春风下赤城。

### 【遇雨未发】

寒侵诗梦晓初回，风雨长松撼半崖。绝岫黑云笼古殿，虚檐玉柱碎空阶。  
纱窗正熟佳人睡，石磴应伤客子怀。鞍马待晴行未得，木鱼声里过晨斋。

### 【述怀（三首）】

飘零孤影寄天涯，梦断春风二鼓挝。闷上心来须赖酒，愁驱睡去胜如茶。  
龙潜北海收雷迹，豹隐南山养雾花。天产我材应有意，不成空使二毛华。

梅时又过牡丹期，昼掩重门坐似痴。为擘愁眉须赖酒，欲言雅志岂无诗。  
浮云暖日阴晴里，残梦春风富贵时。一片肝肠坚玉石，肯随风絮入狂吹。

思量闲里百优游，只得寻常两事忧。中酒未醒过似病，搜诗不得胜如愁。  
便教酒病凭诗解，纵有诗愁着酒酬。此外谁无名利念，红尘千丈尽悠悠。

### 【襄阳答王仲思】

昼夜干戈备不虞，等闲诗酒兴全踈。承君西属三词至，愧我东回一字无。  
麾下雄兵山有虎，目中穷寇釜奔鱼。秋风咫尺襄樊了，好约扁舟泛五湖。

### 【初夏】

好在熏风入舜弦，杨花飞去了三眠。迎眸新绿初长日，回首残红又来年。  
香满蜜脾蜂翅懒，泥干画栋燕巢全。多情无奈春归去，赖是园林煮酒天。

### 【梅雨】

犀浦光风四月新，一天细雨弄寒温。丝丝檐外难成滴，湛湛江心不见痕。  
煮酒园林妨饮兴，暮云楼阁入吟魂。尽教燕子衔春去，半湿纱窗睡正昏。

### 【春阴】

轻云薄薄锁峰峦，微暗书窗觉嫩寒。寂寞梨花浑欲湿，颠狂柳絮尚犹干。  
争泥燕子情应喜，抱蕊游蜂意欲阑。说与密云休吝雨，一犁早足老农欢。

### 【风柳】

澹澹池塘近楚宫，绿腰袅娜学盘中。乱摇荒草飞轻白，细搭朱阑拂落红。  
枝上娇莺啼恰恰，树边舞蝶意恁恁。东君应着吹嘘力，要把春愁一埽空。

### 【题保定抱阳山寺】

山僧掣脱利名缰，特去幽岩构一堂。兀坐忘机禅榻静，高吟纵意竹窗凉。  
奔驰世外心千里，参透人间梦一场。终日杜门稀万事，此中滋味少人尝。

### 【题池州九华山（二首）】

萍浦波平两岸风，羣山争妬九华雄。城头秋日掀髯里，槛外诗成极目中。  
霞日晚时山更翠，江鸥潜处蓼偏红。楼间多少前贤句，惆怅烟岚自古同。

客逢佳节若为酬，地主相邀上北楼。满目奇观风日晚，一襟清兴不胜秋。  
笑倾琥珀欢无极，醉指芙蓉看未休。莫怪羣山竟遮映，数峰高处愈风流。

### 【南征（二首）】

百战归来气未松，紫泥又起作元戎。楼船万牒三山外，塞马千羣百粤中。举目山川浑各异，伤心风景不相同。明年事了朝天去，铜柱东边第一功。

离多会少古皆然，惟我平生苦太偏。已是十年驱战马，又还万里驾征船。相思回首南天角，独许倾心北阙边。寄语古人知道否，戮鲸沈海在来年。

### 【送张孝先】

乘驿归来气未停，江头还又送君行。少年鞍马峥嵘路，暮岁笙歌富贵程。半纸荒诗千里纸，一杯别酒十分情。故乡为向诸公道，功业悠悠白髮生。

### 【读韩信传】

一怒燕齐楚赵收，将军今古果谁俦。后来肯为陈豨计，先日何辞蒯彻谋。自是多年惭哙等，何能轻举学留侯。可怜一片肝肠铁，却使终遗万古羞。

### 【共赋行田】

不屑人间事业忙，日迷歌舞少年场。楼台夜月延佳客，花竹春风拥谢娘。笑倩钗金挑烛影，醉嫌杯玉擘橙香。谁知原上农家子，鞭袅残星晓露凉。

### 【春雪】

余寒料峭黄昏暮，惊见东风吹柳絮。杜陵野老独归来，却入灞陵桥上路。黄莺愁立花深处，恨湿金衣寒两羽。园林浑似晚春时，一片琼花飞玉树。

### 【寄枢密院郭良弼】

三百年基数战休，君臣束手愿归囚。上天有命圣皇福，下国无谋贤相筹。笑我青蝇随骥尾，看人沧海据鳌头。此行幸见太平了，收拾琴书觅旧游。

### ○七言絕句

### 【槐井】

翠浮石甃雨苔青，影落寒泉墮月明。酒醒渴懷无处着，绿阴风送辘轳声。

### 【即席赠别】

离筵不必奏笙簧，说剑论诗醉一场。别后有期期不定，水萍风絮雨茫茫。

### 【游春】

闲逐东风信马啼，一鞭诗思曲江堤。行行贪咏梨花雪，却被桃花约帽低。

### 【读李广传】

弧矢威盈塞北屯，汉家飞将气如神。但教千古英名在，不得封侯也快人。

### 【老子送西游图】

玄教渊源自广成，五千文字总忘情。先生本是无为者，何苦青牛万里行。

### 【醉中（二首）】

玉液流春畅白鸥，醉时不觉有离愁。轩昂两袖乾坤窄，疑是阴阳之外游。金杯潋灩涨蒲萄，玉颊潮红意气豪。一撮乾坤是何物，古今只解戏儿曹。

【墨竹】

麝墨云香小木丛，淡烟横月翠玲珑。小屏春锁绿窗梦，也胜江湖烟雨中。

【射虎】

黑风高骑卷空山，怒吼岩林出锦斑。得意将军飞铁镞，忽惊一点草梢殷。

【出猎】

臂鹰携犬袴腰弓，四野长围马疾风。恨煞棘林狐兔走，肯教容易出围中。

【新燕】

海棠开后月黄昏，王谢楼台寂寂春。柳外东风花外雨，香泥高垒画堂深。

【燕语】

入户穿帘语画梁，几惊春睡恼人肠。争如凭此呢喃舌，说与东君莫去忙。

【青杏】

落尽残红绿满枝，青青如豆酿酸时。佳人摘得新尝怯，一点春愁锁画眉。

【柳絮】

东风殢煞柳梢头，吹去香绵得自由。不到池塘成翠靥，颠狂飞入酒家楼。

【柳绵】

暗织千丝了不忙，不须蚕茧不须桑。请君试看春风外，杨柳枝头喷雪香。

【诗魂】

渺渺幽怀与月高，花前醉里兴增豪。也曾天外搜佳句，又逐东风到酒槽。

【闻角】

戍楼一曲老龙嘶，霜满秋空月影西。客里梦回听不得，残灯明灭伴人啼。

【寒食后】

家家钻火露新烟，花褪残红柳吐绵。底是游人肠断处，杏桃影里拆秋千。

【自遣】

独对西风酒一尊，可怜庭院正黄昏。何当钓出沧浪月，豁我诗魂伴醉魂。

【碧桃花】

应是玄都观里仙，为嫌白淡厌红蔫。故栽一种新颜色，疑是飞仙坠翠钿。

【烛泪】

惜别终宵话不休，煌煌灯烛照离愁。蜡花本是无情物，特向人前也泪流。

【未开牡丹】

包藏国色与天香，尽使游蜂自在狂。直待百花零落后，旋夸魏紫共姚黄。

【红梨花】

嫣然带雨湿胭脂，却似去年霜叶时。说与谪仙浑不识，向人谁咏雪香诗。

【梅雨】

轻云薄薄暗江干，几阵纱窗送嫩寒。浓醉呼童新摘得，未黄梅子已微酸。

### 【送春】

东君回驭欲何之，把酒江头话别离。流水泛红留不住，尽教沈醉不须思。

### 【垂丝海棠】

环儿宴罢沈香下，困竒东风绿树阴。可是醉头扶不起，低垂芳脸漫沈吟。

### 【拆秋千】

画柱青苔卧寂寥，彩绳无计恋春娇。可怜明月梨花院，闲煞春风第一宵。

### 【花落】

流水无情来洞口，狂风何意恋枝头。惜花人在东风外，更比莺儿燕子愁。

### 【红叶】

怪来清晓霜如雪，一夜千林染猩血。豪气如虹酒似川，直教醉脸红如叶。

### 【晚归】

笑谈尊俎兴何穷，鲸吸琉璃琥珀浓。沈醉戟门归去晚，月明街静一声钟。

### 【压沙懷古（二首）】

秦宫汉苑为功名，梵寺何由也废兴。试问雪香庭上月，向人脉脉不能磨。  
桃花惯听玄都观，万树梨花是压沙。一夕春风俱埽地，雪香庭下尽桑麻。

### 【春寒】

去岁清明花簇檐，今年寒食尚凝严。往来忙煞蜂儿翅，偷采畦花酿蜜甜。

### 【晚凉】

绿阴庭院半昏黄，月窟风来桂子香。好挈一壶呼李白，扁舟归去醉沧浪。

### 【榴花】

猩血谁教染绛囊，绿云堆里润生香。游蜂错认枝头火，忙驾薰风过短墙。

### 【效吕洞宾步虚词（三首）】

紫微朝罢下天关，穩跨青鸾落世间。两袖春风何处去，洞庭东畔有三山。  
踏遍尘寰天外天，兴亡万劫入幽玄。尽教鸡晓钟催夜，一点虚名日月先。  
俯视王侯一介轻，愚聋人世可怜生。阴阳纵有难拘束，惟恨人间落姓名。

### 【晚蝉】

三生齐女旧精魂，哭断残阳雨后村。千古闺愁无处着，断肠声里又黄昏。

### 【落霞】

夕阳红影衬云衣，一段龙文锦不机。诗在滕王高阁下，半天孤鹜与齐飞。

### 【骤雨（二首）】

沧海龙飞霹雳惊，云间电影万蛇明。六丁怒挽天河水，特为世间洗甲兵。  
风拥黄云龙驾海，雷驱紫电雨翻盆。长虹千丈忽截断，一片风波起市门。

### 【雪谷早行图（二首）】

短衣匹马五更寒，老雪荒山去路难。为问此行成底事，要携春色下长安。

马駝残梦过前溪，云鎖空山雪四垂。勲业本从辛苦得，可怜歌酒富家儿。

【问梅】

东风桃李竞春光，何苦前村雪里芳。孤洁不教尘眼浣，野桥斜月自昏黄。

【忆梅】

记得年时雪后村，月明诗酒共黄昏。自从别后无消息，一片相思入梦魂。

【春信】

庾岭梅花喷雪香，灞桥烟柳弄鹅黄。故乡望断无消息，独倚东风雁数行。

【读书灯】

半窗寒雨夜深深，烧断兰膏一寸金。莫笑十年尘壁上，也曾明破圣贤心。

【跋张伯宁义士图】

刺襄豫让不日死，立武程婴冠青史。燕山义士张伯宁，千古英名高二子。

【述懷】

气吐长虹志未摅，剑华生涩土模糊。收藏好在甘无用，夜半荒鸡待一呼。

【泛舟】

半岸澄波雨后平，一篙软绿信流行。满船明月双瓶酒，歌入荷花深处横。

【水鸥】

万里长江两白鸥，溶溶泄泄恣沈浮。一般都在春风里，反不如他得自由。

【落花】

莫为春归怨子规，百花开尽是飞时。算来只是东君罪，不合当时着力吹。

【题采莲图】

小娃采得白莲还，此个工夫有底难。多少桑间辛苦妇，谁人移向画图看。

【投宿】

荒村投宿马恹恹，暂歇离鞍古院中。酒尽一杯春日暮，吟鞭轻袅兴无穷。

【题曹娥庙】

一夕为亲犹尽孝，若为男子事君何。江淮多少英雄将，厚禄肥家学倒戈。

【霜月早行】

霜满溪桥月满山，哦诗驴背怯清寒。那知年少青楼客，醉拥芙蓉梦木兰。

【压沙懷古】

已闻春日雪生香，更着秋来叶醉霜。到此春秋无一物，不堪回首吊兴亡。

【过江】

磨剑剑石石痕裂，饮马长江江水竭。我军百万战袍红，尽是江南儿女血。

【春月】

分破黄昏绿柳烟，娟娟落影卧秋千。休夸八月中秋夜，桃杏香中更苦怜。

【柳眉（二首）】

似敛还舒嫩觉羞，隋堤如为古今忧。翠尖管取传春意，莫向长亭管别愁。  
睡起纱窗对晓奁，暂时初识远山尖。多情笑煞张京兆，应恐香螺浣玉纤。

【海棠】

风卷晴霞空树头，东皇西去太真愁。可怜零落胭脂色，绿叶争如枝上稠。

【白莲】

洒泪湘妃不喜妆，和烟迷月涨秋塘。翠盘影里呈妍白，恨煞诗人玉有香。

【佳人昼寝图】

午枕风微雾縠凉，日长睡损玉霓裳。此生幸免春蚕苦，何事无心到绣床。

【守一卷头】

世事翻腾尽万般，一心长拟泰山安。酒壶书卷林泉意，更要诗人仔细看。

淮阳集诗余

乐府

【木兰花慢（题亳州武津關）】

忆谯都风物，飞一梦，过千年。羨百里溪程，两行堤柳，数万人烟。伤心旧家遗迹，谩斜阳柳，水接长天。冷落故祠香火，白云淚眼潜然。行藏，好向故人传，椽笔舞蛮笺。总纠纠貔貅，秋风江上，高卧南边。功名笑谈尊俎，问锦江何必上楼船。他日武津關下，春风骄马金鞭。

【又（征南三首）】

混鱼龙人海，快一夕，起鷗鹏。驾万里长风，高掀北海，直入南溟。生平许身报国，等人间生死一毫轻。落日旌旗万马，秋风鼓角连营。炎方，灰冷已如冰，余烬淡孤星。爱铜柱新功，玉關奇节，特请高纓。胸中冷然冰雪任，蛮烟瘴雾不须惊。整顿乾坤事了，归来虎拜龙庭。

【又】

功名归堕甑，便拂袖，不须惊。且书剑蹉跎，林泉笑傲，诗酒飘零。人间事良可笑，似长空云影弄阴晴。莫泣穷途老泪，休怜儿女新亭。浩歌，一曲饭牛声。天际暮烟冥，正百二河山。一时冠带，老却升平。英雄亦应无用，拟风尘万里奋鹏程。谁忆青春富贵，为怜四海苍生。

【又】

乾坤秋更老，聽鼓角，壮边声。纵马蹙重山，舟横沧海，戮虎诛鲸。笑入蛮烟瘴雾，看旌麾一举要澄清。仰报九重圣德，俯怜四海苍生。一尊，别后短长亭。寒日促行程，甚翠袖停杯。红裙住舞，有雨君聽。鹏翼岂徒高举，卷天南地北日升平。记取归来时候，海棠风里相迎。

【满江红（襄阳寄顺天友人）】

奔驿南来，拥貔貅，且趋江右。良自愧，劣才微渺，圣恩洪厚。万里长江今我有，百年坚壁非他守。看虎牙，飞上万山头，诛羣丑。风雨梦，乡關友。南北事，君知否。寄一緘梅信，小春时候。夜静戟门严鼓角，月明莲幕闲诗酒。怕故人，相忆问归期，平蛮后。

### 【临江山】

千古武陵溪上路，桃花流水潺潺。可怜仙侣剩浓欢，黄鹂惊梦破，青鸟唤春还。回首旧游浑不见，苍烟一片荒山。玉人何处倚阑干，紫箫明月底，翠袖暮云寒。

### 【又】

爱煞林泉风物好，羨他归去来兮。世缘相挽又还思，功名当壮岁，疎懒记当时。肝胆自知尘辈异，鳳池麟阁须期。风云满目任时宜，东山高卧处，丝竹醉吳姬。

### 【点絳唇（咏海棠）】

醉脸匀红，向人无语夸颜色。一枝春雪，犹染嵬坡血。庭院黄昏，燕子来时节。芳心折，露垂香颊，羞对开元月。

### 【又】

庭院黄昏，子规啼破开元梦。晚风吹动，似舞霓裳弄。有色无香，好着诗人讽。和谁共，月廊烟重，烧彻兰膏鳳。

### 【又】

星斗文章，词源落落倾胸臆。十年南北，几度空相忆。把酒留君，后会知何夕。愁如织，一鞭行色，春雪梅花驿。

### 【又】

春日前村，一枝香彻江头路。月明风度，清煞西湖句。昨夜幽欢，梦里谁呼去。愁如许，觉来无语，青鸟啼芳树。

### 【又】

独上高楼，恨随长草连天去。乱山无数，隔断巫阳路。信断梅花，惆怅人何处。愁无语，野鸦烟树，一点斜阳暮。

南乡子深院日初长，万卷诗书一炷香。竹掩茅斋人不到，清凉茶罢，西轩读老庄。世事莫论量，今古都输梦一场。笑煞利名途上客，干忙。千丈红尘两鬓霜。

### 【又（送刘仲泽寿）】

天地萃英灵，秀出人龙问世生。不只文章为第一，峥嵘，气吐虹霓万丈横。白褐黑头卿，埋灭黄尘气未平。昨夜长庚高似月，分明，光照乾坤彻五更。

【又（赠歌妓）】

浅淡汉宫粧，扇底春风玉有香。特地向人歌一曲，非常，纵使无情也断肠。  
宝髻绣霓裳，云雨巫山窈窕娘。好着千金携得去，何妨，丝竹东山醉玉觞。

【又（送友人刘仲泽北归）】

烟草入重城，马首關山接去程。几度留君留不住，伤情，一片秋蝉雨后声。  
无语泪纵横，别酒和愁且强倾。后会有期须记取，叮咛，莫负中秋夜月明。

【又（寄刘仲泽）】

音信怪来稀，世态时情固自宜。莫比红尘儿女辈，须知，义士交情死不移。  
应是占花期，箫鼓东城醉玉姬。谁念书生寒屋底，伤悲，忍泪窗前听子规。

【太常引】

晚凉庭院锁黄昏，鼓角静谿门，酒兴恋诗魂。清逸断，梅梢月痕。胸中  
豪气，壶中春色，醉眼小乾坤，今古不须论。且更尽，花前几尊。

【浣溪沙】

山掩人家水绕坡，野猿岩鸟太平歌，黄鸡白酒兴偏多。幸自琴书消日月，  
尽教名利走风波，钓台麟阁竟如何。

【其二】

一片西山画不成，无人来此结茅亭，野猿山鸟乐升平。名利着人浓似酒，  
肝肠熟醉不能醒，黄尘奔走过浮生。

【其三】

新卜西山崦下庄，疎篱编竹草苫堂，门前流水柳成行。满目烟岚诗酒地，  
十年鞍马是非场，虚名半纸几多忙。

【青玉案（寄刘仲泽）】

西风天际征鸿去，问曾过，燕山路，叶落虚亭空绿树。一川秋意，满怀愁  
绪，楼外萧萧雨。天涯望断行云暮，好着蛮笺寄情句，底是相思断肠处。吟  
风赋月，论文说剑，无个知音侣。

【清平乐（四首）】

關河南北，有雁无消息，落日楼头人正忆，啼鸟一声山碧。莺莺燕燕争  
春，红尘马足车轮，惟有新丰豪客，东风老泪沾巾。

高眠窗北，偃卧喧雷息，依约關山归路忆，梦绕池塘春碧。功名负我青  
春，怱怱日月奔轮，且把琴书归去，山林道髮儒巾。

天南地北，何日兵尘息，四海升平归老忆，鳳遠岐山空碧。衣冠滚滚争

春，谁能卧辙攀轮，一剑风云未遂，几回怒髮冲巾。

穷冬冷落，客思添萧索，浊酒沽来须强酌，要把闲愁推却。 时间荣辱何惊，胸中气象休更，且匣风云长剑，天容两鬓青青。

【青春来】

金装宝剑藏龙口，玉带红绒挂虎头。旌旗影里骤骅骝，得志秋，喧满凤凰楼。

【殿前欢（襄阳战）】

鬼门关，朝中宰相五更寒。锦衣绣袄兵十万，拔剑摇环，定输赢，此阵间。无辞惮舍性命，争功汗，将军战敌，宰相清闲

【鹧鸪天（围襄阳）】

铁甲珊珊渡汉江，南蛮犹自不归降。东西势列千层厚，南北军屯百万长。弓扣月，剑磨霜，征鞍遥日下襄阳。玉门今日功劳了，好去临江醉一场。

【天净纱（梅梢月）】

黄昏低映梅枝，照人两处相思，那的是愁肠断时，弯弯何似，浑如弓样眉儿。

【又】

西风落叶长安，夕阳老雁关山，今古别离最难。故人何处，玉箫明月空闲。

后序

胜国淮阳张献武王，初以中州着姓，臣事蒙古，为之奔走效力，逼宋海隅，遂灭其国，功业虽盛，君子弗取，独其诗集之仅存者。尝取读之，据鞍横槊，意气豪放。由军中雅歌而下，少见其比况。时，方驰逐金戈铁马间，自非有志于投戈讲艺，息马论道，奚暇及此，是则为可取焉者也。诗集首题【淮阳张献武王】，元人盖侈其爵谥云尔。乃今僭易之曰《张淮阳诗集》。若唐之韦苏州以诗鸣、宋之秦淮海以乐府鸣之类是已。乐府仍附于其后。顾旧本，触首随落，且传之者复甚钞。于是拾遗补阙，重加校正，命工翻刻，庶备元诗之一家。张讳宏范，字仲畴，中州河内人，履歷之详，具载《元史本传》云。

时正德辛未岁孟冬之吉知公安县事宿人 周钺 书